


surat popular la'o hamutuk



instituto ba analiza no monitor rekonstrusaun timor loro sa'e

FETO HO MANE NO KONSTRUSAUN SOSIAL

Iha prosesu dezvoltamentu nasaun Timor Lorosa'e ema hotu prezisa partisipa iha prosesu ne'e nia laran. Maibe, iha realidade feto ladun hetan oportunidade diak.

Ida ne'e tanba iha ita nia sosiedade, ema barak fiar katak mane importante liu feto. Ideolojia ne'e naran patriarkia, ne'ebe la fo pozisaun

importante ba feto. Tuir hanoin ida ne'e feto mak tenke halo servisu hotu iha uma laran no hanesan fen nia tenke pasensia simu buat ne'ebe mak akontese iha nia moris, no mane mak tenke sai nudar xefe familia no nia mak bele decide no foti disizaun importante. Sistema patriarkal ne'e la fo valor diak ba feto. Tuir los feto mos iha kapasidade hanesan mane no iha direitu hanesan mane. Feto mos iha direitu atu koalia no decide kona-ba ninia moris.



SAIDA MAK GENERO ?

Nudar ema, feto no mane iha direitu hanesan.

Mane ho feto mos iha kapasidade no matenek hanesan.

Maibé, bainhira sei ki'ik ema fahe servisu no direitu entre labarik mane ho labarik feto. Diferensa ida ne'e ita hare husi metodu eduka, hanorin no hakiak iha familia laran no aktividade ne'ebé mak labarik feto ho mane halo. Inan aman sira barak se'i fo prioridade bot liu ba oan mane. Labarik feto tenke servisu iha dapur no labarik mane tenke estuda. Ida ne'e akontese iha ita nia moris to'o ita bo'ot.



Diferente entre mane ho feto ne'e sosiedade mak halo diferenca tuir sosiedade nia hare. Maibe, husi kultura ida ba kultura seluk la hanesan. Ezemplu, iha fatin ka kultura ruma feto la bele eskola bo'ot ka mane la bele te'in iha dapur. Ida ne'e akontese iha fatin ou kultura balu deit no ida ne'e hanesan sosiedade ida-idak nia haree, hanoin ou tradisaun.

Atu hatene ho konese diferensial konstrusaun sosial ida ne'e, maka ita uza lia fuan **genero**.

VIOLENSIA NO KONSTRUSAUN SOSIAL

Violensia dala barak mosu tamba problema injustica genero. Mane sira fiar no hanoin katak sira mak superior no iha poder liu duke feto sira. Mane sira sente katak sira merese atu baku no foti desizaun haroru feto. Neduni mane sira dala barak uza sira nia superioridades atu hanehan feto sira.



Bazeado ba ideias ne'e, ema barak komesa halo kategorizasaun ba feto no mane. Feto tenke obedese ba mane nia desizaun, servisu iha uma laran deit no sai servidor ba mane sira. Tamba ne'e dala barak mane sira uza sira nia kbit sira ne'e atu justifika violensia nebe mak sira halo hasoru feto. Mane sira no sociedade balu mos hanoin katak wainhira halo violensia ba feto ne'e normal no laos sala bot ida.

Tinan ba tinan feto no mane aprende katak sira tenke halo tuir karakteristiku nebe sociedades halo tiha ona. Se hahalok no karakteristiku ne'e ita hetan liu husi prosesu aprende, karik ita mos bele aprende buat nebe justu liu no bele halakon dominasaun mane ba feto. Nomos mane sira bele aprende atu labele halo violencia hasoru feto sira komesa agora ba oin.

VIZAUN BA OIN ?

Konstrusaun sosial ne'ebé ita aprende husi ita nia sosiedade balu justu no balu la justu. Buat ne'ebé la justu ita presiza halakon. Atu halakon ita presiza aprende oinsa atu halakon. Tanba to'o ohin loron ita aprende no moris iha injustisa nia laran. Moris iha justisa katak feto ho mane hetan oportunidade hanesan iha sektore hot-hotu no mos moris iha igualidade nia laran. Hodi nune'e ita bele dezemvolve ita nia nasaun foun ida ne'e ba diak.



Perguntas

- Oinsa mane no feto sira sai husi konstrusaun sosial ne'ebé la justu?
- Oinsa hakotu siklu violensia ne'ebé mosu durante ne'e?
- Oinsa feto no mane bele halo planeamentu no hala'o dezenvolvimentu hamutuk?
- Oinsa moris iha justisa no igualidade nia laran?